

四庫全書

子部

欽定四庫全書

子部
太平御覽卷
一百九十七至
二百三

詳校官侍讀學士_臣沈咸熙

員外郎_臣牛稔文覆勘

總校官降調編修_臣倉聖脈

校對官助教_臣胡于襄

謄錄監生_臣薛登瀛

欽定四庫全書

太平御覽卷一百九十七

居處部二十五

園圃

園

華表

潘籬

園圃

園圃

說文曰園樹果圃樹蔬也

易曰賁于丘園束帛戔戔

毛詩曰園有桃其實之肴

又曰折柳樊圃

周禮曰場人掌國之場圃而樹之菓蓏珍異之物以時

歛而藏之凡祭祀賓客供果蓏享亦如之

注云果棗栗之屬蓏瓜瓠

之屬珍異蒲桃杞之屬

又曰太宰九職二曰園圃毓草木

又曰園廛二十而一注云以利少故二十而稅一也廛
城市中空地

又曰圃以樹事貢草木謂果瓜葵韭

論語曰樊遲請學為圃子曰吾不如老圃

史記曰梁有漆園楚有橘柚園

又曰王翦為秦將伐楚請善田宅園池甚衆

漢書曰始曹參微時與蕭何善及為宰相有隙至何且
死所推賢唯參參代何為相國舉事一遵何之約束擇

郡國長吏訥於文辭謹厚長者即召為丞相吏吏之刻
深欲務聲名輒斥去之日夜飲酒卿大夫以下吏及賓
客見參不事事來者皆欲有言至者參輒飲以醇酒度
其欲有言復飲酒而後去終莫得闕說以為常相舍後
園近吏舍吏舍日飲歌呼從吏患之無如何迺請參遊
後園聞吏醉歌呼吏宰相怒召按之迺反取酒張坐飲
大歌呼與相和參見人之有細過掩匿覆蓋之府中無
事

又曰董仲舒廣川人也以治春秋孝景時為博士下帷
講誦弟子傳以久次相受業或莫見其面蓋三年不窺
園囿其精如此

後漢書曰法員隱大澤講論藝術歷年不窺園囿

又曰竇憲以賤直請奪沁水公主田園

沁水明
帝女

主畏逼

不敢言後肅宗駕出遊過園指以問憲陰喝不得對

於陰

禁反喝一介
反噎塞也

後發覺帝大怒責憲曰貴主尚見侵奪何

况小人哉國家棄憲如孤雛腐鼠耳憲大震懼

魏志曰顏斐字文林為京兆守於府下起菜園使吏投簡鋤治也

晉書曰范任好學外氏家貧無以資給任乃廬于園中布衣蔬食然新寫書寫畢誦讀亦遍遂博學多通善談名理

又曰華廩既廢黜武帝後又登凌雲觀望見廩首宿園阡陌甚整依然感舊太康初大赦乃得襲封久之拜城門校尉遷左衛將軍數年以為中書監

又曰和嶠性至儉家有好李帝求之不過數十王濟侯其上直率少年詣園共啖畢伐樹而去

王隱晉書曰涼州牧張駿增築四城箱各千步東城殖園果命曰講武場北城殖園果命曰玄武圃皆有宮殿宋書曰柳元景多產業居南岸有數十畝菜園時有人求之或留錢元景曰本立園自為供喫豈求利耶

齊書曰世祖太子性頗奢麗宮內多雕飾精綺過於王宮開治玄圃園與臺城北塹等其樓觀塔宇多聚奇石

妙極山水慮上宮望見乃傍列修竹內施高障造遊墻
數百間施諸機巧宜須障蔽以晉明帝為太子時立西
池乃啟世祖引前例求於東田起小苑上許之窮極制
度

陳留耆舊傳曰范丹學通三經常自任灌園

向秀別傳曰秀與呂安灌園於山陽收其餘利以供酒
食之費

莊子曰子貢過漢陰見一丈人為圃畦鑿隧而入井抱甕而

出灌子貢曰有械於此一日浸百畦用力甚寡而見功
多夫子不欲乎為圃者仰而視之曰奈何曰鑿木為機
後重前輕挈水若抽其名為桔槔圃者忿然作色而笑
曰吾聞之吾師有機械者必有機事有機事者必有機
心機心存於胸中則純白不備純白不備則神不定神
不定者道之所不載也吾非不知羞不為也子貢告孔
子孔子曰假修渾沌之術者也

雜記曰於陵子辭卿相而桔槔灌園

又曰戴宏為河間相自免歸而灌蔬以經教授也

西京雜記曰茂陵富人表廣藏蝕巨萬家童八九百人於邛山下築園東西五里百步激流水注其內構石為山高十餘丈連延數里養白鸚鵡紫鴛鴦旄牛青兕奇禽怪獸委積其間聚沙為洲激水為波其中江鷗海鵠乳雛產鷄延漫林池奇樹異草靡不具植屋皆徘徊連屬重閣修廊行之移晷不能偏廣有罪誅沒入為園鳥獸草木僉移上林苑中

又曰樂遊園自生玫瑰樹樹下多苜蓿苜蓿亦名懷風
時人或謂光風風在其間常肅然日照其花有光彩故
名苜蓿曰懷風茂陵謂之連枝草

又曰梁孝王兔園有落猿岩棲龍岫鴈池鶴洲鳧宮
觀相屬

隋圖經曰史記謂梁孝王築東苑方三百里是曰兔園
王褒雲陽記曰車箱阪下有梨園一頃樹數百株青翠
繁密望如車蓋

水經注曰睢水東西流入於竹圃水次綠竹陰渚青青
彌望世人言梁王竹園也

又曰玄瓠灣中地數頃有栗名小殊不並固安之實也
然歲貢三百石以充天府水渚即栗洲樹木高茂望若
屯雲中有栗堂甚閑敞牧宰英彥多所遊薄

魏志曰有芳林園桐園芳林後避少帝諱改為華林
晉宮閣名靈芝園鄴有鳴鶴園蒲桃園華林園

司馬彪續漢書曰濯龍園在洛陽西北角也

郭仲產仇池記城東有首荷園

列女傳魯漆室之女曰昔有客繫馬園中馬逸踐葵使
予終歲不飽葵

淮南子曰園有螫毒葵藿為之不採

陳留記曰園叟襄邑人也叟始居園中故謂之園公

天文要集記曰庖瓜為天子果園有天園主果實茄蓄
儲

又曰芙蓉園本隋氏之離宮居地三十頃周迴十七里

貞觀中魏王泰苑又賜東宮令屬家令寺園中廣廈修廊連亘屈曲其地表延爽塏跨帶原隰又有修竹茂林綠被岡阜東坂下有涼堂堂東有臨水亭按黃圖曲池漢武所造周迴五里池中遍生荷芰菰蒲其間禽魚翔泳宣帝立廟曲池之北名曰樂遊廟即今昇平坊內基趾是也此在秦為宜春苑在漢為樂遊苑宇文愷營建京城以羅城東南地高不便故即此隅頭一方餘地穿入芙蓉池以虛之

郡國志云西夷有荔枝園僊僊施夷中最賢者古之謂
僊僊之富多以荔枝為業園植萬株樹收一百五十斛
隋圖經曰司竹園在盩厔縣東十二里穆天子西往至
玄池乃植竹即此是也

史記曰渭州千畝竹漢謂鄠杜竹林故有司竹都尉西
都賦所謂鄠杜濱其竹林果園芳草甘木也

園

史記曰竇太后好黃老書召轅固問老子書固曰此家

人言耳太后怒曰安得司空城旦書乎乃使固入圈擊豕

漢書曰孝武帝作建章宮度為千門萬戶其西則數十里虎圈

又曰李禹有寵於太子然好利亦有勇嘗與侍中貴人飲食侵陵之莫敢應後愬之上召禹使制虎懸下圈中未至地有詔引出之禹從洛中以劔砍絕纜欲刺虎

師古

曰落與絡同謂當時
繼絡而下也纜索也

三輔故事曰師子園在建章宮西南

烈士傳曰秦名公子無忌無忌不行使朱亥奉璧秦王
大怒將朱亥著虎圈中亥瞋目視虎虎不敢動

郡國志曰雍州虎圈在通化門東二十五里秦王置朱
亥於其中亥瞋目視虎不敢動漢文帝問上林尉處及
馮婕妤當熊在此

漢宮殿疏曰有羸園有師子園武帝造秦故虎圈周匝
三十五步長二十步西去長安十五里

牢

說文曰牢閑養牛馬園也

詩曰乃造其曹執豕于牢注云曹群也言搏豕於牢中
以為飲酒之醑

穆天子傳曰伐犬戎獲虎畜於東虞命曰虎牢

事具州郡

曹子建求自試表曰如微才不試沒世無聞獸息鳥視
終於白首此徒囹圄之養物非臣之所志也

藩籬

易曰羝羊觸藩羸其角

詩曰折柳樊圃

或云藩

左傳曰宋向戌請弭諸侯之兵襄公二十七年諸侯之大夫會於宋以藩為軍注云示不相忌也

哀公十二年衛侯會吳于鄆吳人藩衛侯之舍子服景伯謂子貢曰夫諸侯之會事既畢矣侯伯致禮地主歸餼以相辭也今吳不行禮於衛而藩其君舍以難之子盍見太宰乃請束錦以行乃免衛侯

晉書曰庾袞字叔褒初袞諸父並貴盛唯袞父獨安貧約躬耕稼穡以給供養而執事勤恪與子弟樹籬跪以授條或曰今在隱屏先行何恭之過也荅曰幽顯易操非君子意也

宋書曰謝瞻字宣遠弟晦時為宋臺右衛權遇已重於彭城還都迎家賓客輻湊瞻在家驚駭謂晦曰吾家以遠退為業汝遂勢傾朝野此豈門戶福耶乃豎籬隔門庭曰吾不忍見

南朝官苑記曰建康籬門舊南北兩岸籬門五十六所
蓋京邑之郊門也如長安東都門亦周之郊門江左初
立並用籬為之故曰籬門南籬門在國門西三橋籬門
在金光宅寺側東籬門本名肇建籬門在古肇建市之
東北籬門今覆舟東頭玄武湖東南角今有亭名籬門
亭西籬門在石頭城東議軍府在西籬門外路北白楊
籬門外有石井籬門

莊子曰願遊其藩

閒居賦曰芳枳堅籬

宋玉對曰問藩籬之鷦

鷦鷯賦曰鷦鷯長於藩籬之下

華表

崔豹古今注程雅問曰堯設誹謗之木何也荅曰今之華木以櫛木交柱頭狀如華形似桔槔大路交衢悉施焉或謂之表木以表王者納諫亦以表識衢路秦乃除之漢始復今西京謂之交午柱

又遼東華表見鶴門

又燕昭王墓前華表見程門

太平御覽卷一百九十七

欽定四庫全書

太平御覽卷一百九十八

宋 李昉等 撰

封建部一

叙封建

爵

異姓王封

叙封建

周禮夏官職方氏曰九州之邦國規方千里為王畿其

外方五百里曰侯服又其外方五百里曰甸服又其外
方五百里曰男服又其外方五百里曰采服又其外方
五百里曰衛服又其外方五百里曰蠻服又其外方五
百里曰夷服又其外方五百里曰鎮服又其外方五百
里曰蕃服凡邦國千里封公以方百里則四公方四百
里則六侯方三百里則七伯方二百里則二十五子方
百里則百男以周知天下

史記曰太史公曰殷以前尚矣周封五等公侯伯禽康

叔於魯衛地各四百里親親之義褒有德也太公於齊兼五侯地尊勤勞也武王成康所封數百而同姓五十上地不過百里下三十里以輔衛王室

又曰高祖定天下田橫猶居海島帝喻之曰橫來大者王小者侯

又曰齊威王召即墨大夫而語之曰自子之居即墨也毀言日至然吾使人視即墨田野闢人民給官無留事東方以寧是子不事吾左右以求譽也封之萬家

又曰鄒忌以鼓琴見齊威王王悅之三月而受相印淳于髡見之曰善說哉髡有愚志願陳諸前髡說畢即出至門而語其僕曰是人者吾說之微言五其應我若響之應聲是必封不久矣

漢書曰李廣與望氣王朔語自漢擊匈奴廣未嘗不在其中而諸校尉材能不及中人以軍功取侯者十數人廣不為人後然終無封邑者何也豈吾相不當侯耶朔曰將軍自念豈有所恨者乎廣曰吾為隴西太守羌嘗

反吾誘降八百餘人詐而同坑曰禍莫大於殺降此乃將軍所以不得封侯也

東觀漢記曰上封功臣皆為列侯大國四縣餘各有差博士丁恭等議曰古帝王封諸侯不過百里故利以建侯取法於雷上曰古之亡國皆以無道未嘗聞封功臣地而滅也

又曰馮勤為郎中給事尚書以圖議軍糧任事精勤遂見親識由是使典諸侯封事

百官表注記曰王者之制公侯伯子男凡五等上大夫
卿下大夫上中士下士凡五等周室興隆三聖制法立
爵五等封國八百親親建國則周公宅魯康叔啟衛賢
賢表德則太公封齊九命既賜用征諸侯魯以周公之
故郊祭昊天車服有裕季世陵遲僭施無度強弱相吞
舊制不復循也禹貢徐州土五色王者取五色土以為
社封四方諸侯各割其方色土與之皆苴以白茅皆假
銅虎竹使符第五夫為諸侯受封之始各有采地百里

之諸侯以四十里為采地七十里之諸侯以三十里為采地五十里之諸侯以二十里為采地其後子孫雖有黜而采地世世不黜

漢雜事曰天子大社以五色土為壇封諸侯者取其土苴以白茅授之各以所封方之色以立社於其國故謂之受茅漢興唯皇子封為王者得茅土其他臣以戶賦租入為節不受茅土不立社

王隱晉書曰元康初楊駿輔政封賞過度石崇與散騎

常侍蜀郡何舉共為駿議以為陛下聖德光被皇靈啟
祚正位宣化萬國歸心今承洪基此乃天授至於班爵
行賞優於太始

崔鴻十六國春秋後燕錄曰苻定苻紹等降慕容垂下
書封紹等為侯以酌秦王之惠且擬三恪

吳越春秋曰吳王聞勾踐盡心自守增之以封越王乃
使大夫種賈葛布十萬甘蜜九竈文筭七枚狐皮五雙
以報增封之禮

韓子曰穰侯越魏而東攻齊五年秦不益一尺之地反
成其陶邑之封應侯以攻韓八年成其汝南之封自是
以來諸用秦者皆應穰之類也故勝戰則大臣尊益地
則私封立

說苑曰鄭桓公東會封於鄭舍於宋東之逆旅逆旅之
叟從外来曰客將焉之曰會封於鄭逆旅之叟曰聞之
時難得而易失者也今客之寢安殆非會封者也鄭桓
公聞之援轡自駕其僕接浙而載之

袁子曰今有卿相之才居公之位循其治政以寧國家
未必封侯也今軍政之法斬一牙門將者封侯夫斬一
將之功孰與安寧天下者安寧天下者不爵斬一將之
功者封侯失賞之意也

又曰春秋鄭莊公封母弟於京祭仲曰都城過制國之
害也其後卒相攻伐國內大亂故過度則有強臣之禍
鄙小則有微弱之憂秦以列國之勢而并天下自以由
諸侯而起之也於是去五等之爵而改郡縣雖有親子

母弟皆為匹夫及其政衰匹夫一呼而天下去及至漢家見亡秦以孤特亡也於是大封子弟或連城數十靡地千里自關已東皆為王國力多而權重故亦有七國之難

白虎通曰王者即位先封賢者憂民之急也故列土為疆非為諸侯張官設府非為卿大夫皆為民也封諸侯以夏何陽氣盛養故以封諸侯盛養賢也立人君陽德之盛者也

又曰受命之王致太平之美羣臣上下之功故盡封之及中興征伐大功皆封所以褒大功也盛德之士亦封之所以尊有德封者必試之為附庸三年有功因而封之五十里凡士有功者以為附庸附世其大夫有功成封五十里卿成封七十里公成封百里

又曰公居百里侯居七十里何封示之優賢義欲褒尊而上之何以知殷家侯不過七十里曰土有三等有百里七十里五十里公卿大夫者何謂也以爵稱也為爵

稱公卿大夫何爵者量其職盡其才公之為言公正無私也卿之為言章也善名也大夫之為言大扶扶進人也

王充論衡曰堯舜之人可比屋而封桀紂之人可比屋而誅

曹植遷都賦曰余初封平原轉出臨淄中命鄆城遂徙雍邱改邑浚儀而末將適於東阿號則六易居實三遷連遇瘠土衣食不繼

爵

易中孚卦曰鳴鶴在陰其子和之我有好爵吾與爾縻之

左傳襄公三年曰齊莊公為勇爵

設爵位以命勇士

殖綽郭最

欲與焉州綽曰東閭之後臣左驂迫還於門中識其枚

數

識門板數

其可與乎公曰子為晉君也對曰臣為隸新然

二子者譬之禽獸臣食其肉而寢處其皮矣言嘗射得之也

白虎通曰爵五等者法五行或三等者法三光或法三
或法五何質者據天故象三光文者據地故法五行

禮含文嘉曰殷爵三等周爵五等各有宜

王制曰王者之制爵祿凡五等謂公侯伯子男此據周制
也所以名之為公侯何公者公正無私之意侯者侯順
逆也

孝經援神契曰二王之後稱公大國侯皆千乘象雷百
里所潤雲雨同

史記曰秦聞馬服子將乃陰使白起為上將軍竒兵絕趙軍後趙軍分而為二糧道絕秦王聞趙食道絕王自之河內賜民爵各一級發十五已上悉詣長平遮絕救之

又曰秦始皇四年百姓內粟千石拜爵一級

漢書曰惠帝元年民有罪得賣爵三十級以免死罪應

曰一級直錢二千凡為六萬若今贖入三千疋是矣漢武帝時一級七十萬始皇本紀入粟千斛拜爵一級時

制各異賜民爵戶一級六年令民得買爵者也

又曰衛青比年擊胡賦稅既竭不足以奉戰士有司請令民得買爵及贖禁錮免賦罪請置賞官名曰武功爵也

又曰宣帝五鳳四年大司農中丞耿壽昌奏設長平倉以給北邊省轉漕爵關內侯

袁山後漢書曰建寧二年爵乳母趙克為平民君

魏書曰太祖置名號侯爵十八級關中侯爵十七級關外侯十六級五大夫十五級與舊例侯凡六等

魏氏春秋曰黃初三年帝欲封太后母尚書陳羣奏曰
按典籍之文無婦人分土命爵之制在禮婦夫人因夫
爵秦違古法漢氏因之非先王之令典帝曰是也

晉書曰長樂馮恢父為弘農太守愛少子淑欲以爵傳
之恢父終服闋乃還鄉里結草為廬陽瘖不能言淑得
襲爵恢始仕

管子曰爵不尊祿不重者不與圖難犯危以其道為未
可以求之也是故先王制軒冕足以著貴賤不求其美

設爵祿足以守其服不求其觀使君子食於道小人食於力

孟子曰有天爵者有人爵者仁義忠信樂善不倦此天

爵也公卿大夫此人爵也

天爵以德
人爵以祿

古之人修其天爵

而人爵從之今之人修其天爵以要人爵既得人爵而棄其天爵則惑之甚者也

商君書曰明王之所貴唯爵其賞不榮則民急其列不顯則民不事爵易得也則民不貴

淮南子曰爵祿者人臣之銜轡

說苑曰晉文公出亡周流舟之僞去虞而從文公文公反國擇可爵而爵之擇可祿而祿之僞獨不與焉文公酌諸大夫酒酣公曰二三子盍為寡人賦乎舟之僞曰君子為賦小人請陳其辭辭曰有龍矯矯頓失其所一蛇從之周流天下龍反其淵蛇寧其處公瞿然曰子欲爵也請待旦日之朝子欲祿耶請今命廩人之僞曰請而得其賞廉者不受也言盡而名至仁者不為也遂退

終身誦甫田之詩

風俗通曰漢武帝諱徹改曰通侯或曰列侯秦時六國未平將帥皆家關中故稱關內侯通侯言其功大通於王室列者言其功德列著乃饗爵也

王祭爵論曰爵自一級轉登十級而為列侯譬猶秩自百石轉遷而至於公也而近世賞人皆不由等級後無爵封無列侯原其所以爵廢故也司馬法曰賞不踰時欲民速觀為善之利也近世爵廢人有小功無以賞也

乃積累焉顧事足乃封侯非所以速為而及時也上觀古事高祖功臣及白起衛鞅皆賜爵為五大夫客卿庶長以至於侯非一頃而封也夫稍稍賜爵與功大小相稱而俱登既得其義且侯次有緒使慕進者逐之不倦矣

異姓王封

漢書曰高祖定天下功臣異姓王者八國張耳吳芮彭越黥布臧荼盧綰與兩韓信皆徼一時之權變以詐力

成功咸得裂土南面稱孤見疑强大懷不自安事窮勢迫卒謀叛逆終於滅亡張耳以知全至子亦失國唯吳芮之起不失正道故能傳號五世以無嗣絕澤流支庶有以矣夫

以其不用詐力也

漢書曰張耳大梁人也少時及魏公子無忌為客嘗亡命遊外黃外黃富人女甚美庸奴其夫亡邸其父客謂曰必欲求賢夫從張耳女聽為決計嫁之女家厚奉給耳耳故致千里客宦為外黃令高祖為布衣時嘗從耳

遊秦滅魏故購求耳千金耳變姓名之陳為里監門後
項羽滅秦亦聞耳賢迺分趙立耳為常山王田榮襲耳
耳敗走漢漢二年遣耳與韓信擊破趙并陘斬陳餘泚
水上四年夏立耳為趙王耳薨子敖立為王

又曰韓信平齊使人言漢王曰齊夸詐多變反覆之國
南邊楚不為假王以鎮之其勢不定今權輕不足以安
之臣請自立為假王當是時楚方急圍漢王於滎陽使
者發書漢王大怒罵曰吾困於此旦暮望而來佐我乃

欲自立為王張良陳平伏後躡漢王足因附耳語曰漢方不利寧能禁信之自王乎不如因立善遇之使自為守不然變生漢王亦悟曰大丈夫定諸侯即為真王耳何以假為遣張良立信為齊王徵其兵使擊楚

又曰彭越字仲昌邑人也常漁鉅野澤中為盜陳勝起歲餘澤間少年相聚百餘人往從越請仲為長乃行畧地收諸侯散卒得千餘人沛公從碭北擊昌邑越助之昌邑未下沛公引兵西越亦將其衆居鉅野澤中項籍

入關王諸侯還歸越衆萬餘人無所屬齊王田榮叛項
王漢乃使人賜越將軍印使下濟陰以擊楚大破楚軍
漢二年拜越為魏相國將兵畧定梁地漢王之敗彭城
解而西也越皆亡其所下城獨將其兵居河上漢三年
越常往來為漢遊兵擊楚項王與漢王相距滎陽越攻
下睢陽外黃十七城漢王為項籍所敗迺謂留侯曰諸
侯兵不從為之奈何留侯曰彭越本定梁地功多始君
王以魏豹故拜越為相國今豹死亡後且越亦欲王而

君王不蚤定今取睢陽以北至穀城皆許以王彭越則
兵至矣於是漢王發使使越如留侯策使者至越乃引
兵會垓下項籍死立越為梁王

又曰項羽入咸陽黥布為前鋒項王封諸將立布為九
江王後與隨何俱歸漢漢王方踞牀洗足召布入見布
大怒悔來欲自殺出就舍張御飲食從官如漢王居布
大喜過望漢益分布兵而俱北收兵至成臯四年秋七
月立布為淮南王

又曰盧綰豐人也與高祖同里及高祖初起沛綰以客
從入漢中為將軍項籍死使綰別將劉賈擊臨江王共
尉還從擊燕王臧荼皆破平時諸侯非劉氏而王者七
人上欲王綰群臣缺望及虜臧荼乃下詔諸將相列侯
擇群臣有功者以為燕王群臣知上欲王綰皆曰太尉
長安侯綰常從平定天下功最多可王上乃立綰為燕
王諸侯得幸莫如燕王者漢十年陳豨反漢既斬豨其
裨將降言燕王綰使范齊通謀豨所上使使召綰綰稱

病又謂其幸臣曰非劉氏而王者獨我與長沙令耳上
病屬任吕后吕后婦人專欲事誅異姓王者及大功臣
迺稱病不行高祖崩遂亡入匈奴

又曰吳芮秦時番陽令甚得江湖間民心號曰番君天
下之初叛秦也黥布歸芮芮以女妻之因率越人舉兵
以應諸侯沛公攻南陽迺遇芮之將梅鋗呼玄切與偕攻

析酈降之及項羽相王以芮率百越佐諸侯從入關故
立為衡山王項籍死上以銷有功從入武關故德芮徙

為長沙王都臨湘

又曰惠帝崩立孝惠後宮子為帝呂太后臨朝稱制遂立周呂侯子台為呂王台弟產為梁王建城侯釋之子祿為趙王台子通為燕王又封諸呂凡六人皆為列侯太后病困以趙王祿為上將軍居北軍梁王產為相國居南軍戒產祿曰高祖與大臣約非劉氏王者天下共擊之今王呂氏大臣不平我即崩恐其為變必據兵衛宮慎勿送喪為人所制太后崩太尉周勃丞相陳平朱

虛侯劉章等共誅產祿迎立代王是為孝文皇帝

晉書曰初武帝為王時王祥與荀顛往謁謂祥曰相國王尊重列侯既已盡敬今便當拜也祥曰相國誠為尊貴然是魏之宰相吾等魏之三公公王相去一階而已班列大同安有天子三公而輒拜人者損魏朝之望虧晉王之德君子愛人以禮吾不為也及入顛遂拜而祥獨長揖帝曰今日方知君見顧之重矣

北齊書尉景之子榮少歷顯職性粗武天保初封庫狄

干等為王祭以父不預王爵大恚恨十餘日閉門不朝
帝怪遣就宅問之隔門謂使人曰天子不封祭父作王
祭不如死使云須開門受勅祭遂彎弓隔門使者以狀
聞文宣使段韶諭旨祭見韶唯撫膺大哭不答一言文
宣親詣其宅慰之方復朝請尋追封景長樂王

唐書曰安祿山死朝廷欲圖大舉詔郭子儀帥趨京城
師於滴水之西與賊將安太清安守忠戰從元帥廣平
王率藩漢之師十五萬進收長安京師老幼百萬夾道

懼叫涕泣而言曰不圖今日復見官軍是時河東河西
所盜郡邑皆平以功加司徒封代國公入朝天子遣兵
仗戎容迎於灞上肅宗勞之曰雖吾之家國實由卿再
造子儀頓首感謝乾元元年九月詔子儀與九節度之
師討安慶緒以中官魚朝恩為觀軍容宣慰使朝恩害
子儀之功媒孽之召還京師子儀雖失兵柄乃心王室
以禍難未平不遑寢息俄而史思明再陷河洛朝廷肝
食復慮蕃寇逼迫京畿言事者以子儀有社稷大功今

殘孽未除不宜置之散地肅宗深然之上元元年以子儀為諸道兵馬都統復為朝恩所間事竟不行上元二年李光弼兵敗於邙山河陽失守又河中軍亂殺其帥李國貞太原節度使鄧景山亦為部下所殺恐其合從連賊朝廷深憂之後輩帥臣未能彈壓遂用子儀為朔方河中北庭潞儀澤沁等州節度行營廡興平定國副元帥進封汾陽郡王出鎮絳州子儀至絳擒其殺國貞賊首王元振數十人並誅之太原辛雲京聞子儀誅元

振亦誅害景山者由是河東諸鎮率皆奉法

又曰渾瑊阜蘭州人也本鐵勒九姓部落之渾部也父
釋之少有武藝從朔方軍積戰功於邊上累遷至開府
儀同三司寧朔郡王德宗幸奉天瑊率家人子弟自京
城至乃署為行在都虞侯以拒朱泚賊平德宗還宮以
瑊為河中尹河中絳慈隰節度使封咸寧郡王

又曰馬燧字洵美汝州郟城人少嘗與諸兄讀書輟卷
嘆曰丈夫當建功於代以濟四海安能矻矻為一儒哉

燧姿度魁異沈勇多智畧後朱泚之亂燧守太原燧以
晉陽王業所起乃引晉水而注城之東渚以為池寇至
計省守陴者萬人尋兼保寧軍節度使封北平郡王

太平御覽卷一百九十八

欽定四庫全書

太平御覽卷一百九十九

宋 李昉等 撰

封建部二

公封

侯封

伯封

子封

男封

同姓封

外戚封

公封

韋昭辨釋名曰公直也取其正直無私

易師卦曰大君有命開國承家

周書曰能移於衆與百姓同之謂之公

周禮地官曰大司徒職曰諸公之地封土方五百里其
食者半

又春官曰大宗伯職曰公執桓圭

晉書曰陶侃有善相者師圭謂侃曰君左手中指有堅

理當為公若徹於上貴不可言侃以針決之見血洒壁而為公字以紙裹手公字愈明

後魏書曰許洛陽為鴈門太守家田三生嘉禾皆異壟合穎世祖善之進爵北地公

魏志咸熙元年相國晉王奏建五等諸公地方七十里邑一千八百戶置相一人典祠典書典衛典禮各一人妾六人車前司馬十人旅賁四十人

侯封

周易豫卦曰豫利建侯豫順以動故天地如之況建侯
行師乎

又比卦曰地上有水比先王以建萬國親諸侯

又屯卦曰盤桓居貞利建侯

周書曰能樹名生物與天道俱謂之侯

周禮春官大宗伯職曰侯執信圭

又典命職曰諸侯伯七命其國家宮室車旗衣服禮儀
皆以十為節

漢書解詁曰列侯金印紫綬以賞有功功大者食縣邑
小者食鄉亭

後漢書曰馮石襲母公主封獲嘉侯亦為侍中稍遷衛

尉能取悅當代為安帝所寵常幸其府留飲十許日賜

駮犀貝劔佩刀

以班犀
飾劔也

紫艾綬

艾即盤綠色
也其色似艾

玉玦各一

半環曰玦
以飾帶也

又曰丁綝建武元年拜河南太守及封功臣帝令各言
所樂諸將皆占豐邑美縣唯綝願封本鄉或謂綝曰人

皆欲縣子獨求鄉何也。繇曰：昔孫叔敖勅其子受封，必受境墉之地。今繇能薄功微，得鄉亭厚矣。帝從之，封為定陵新安鄉侯，食邑五千戶。徙封陵陽侯。

又曰：韓歆封扶陽侯，好直言無隱諱。帝每不能容，常因朝會聞帝讀隗囂公孫述相與書，歆曰：亡國之君皆有才，桀紂亦有才。帝大怒，以為激發。歆又証歲將饑，凶指天畫地言甚剛切，坐免歸田里。帝猶不釋，復遣使宣詔責之。

又曰建武二年定封景丹櫟陽侯帝謂丹曰今關東故
王國雖數縣不過櫟陽萬戶邑夫富貴不歸故鄉如衣

繡夜行故以封卿耳

前漢書武帝謂
朱買臣之詞也

丹頓首謝

又曰光武下詔封諸將博士丁恭議曰古帝王封諸侯
不過百里故利以建侯取法於雷

又曰陰興遷侍中賜爵關內侯帝後召興欲封之置印
綬於前興固讓曰臣未有先登陷陣之功而一家數人
並蒙爵土令天下歆望誠為盈溢臣蒙陛下之恩澤至

厚富貴已極不可復加至誠不願帝嘉興之讓不奪其志

又曰傅昌嗣建初中遭母憂因上書以家貧不願之封乞錢五十萬為關內侯肅宗怒貶為關內侯竟不賜錢魏志曰張魯自漢中將其餘眾降封魯及五子皆為列侯

又曰文帝黃初二年分三公戶邑封子弟各一人為列侯

又咸熙元年晉王奏建五等諸侯地七十里邑千六百
戶官屬同諸公妾五人車前司馬八人旅賁三十六人
吳志曰全琮字子璜蜀遣將雲長圍逼襄陽琮上疏陳
討雲長之計權時已與呂蒙陰議襲之恐事泄故寢琮
表不荅及功成權置酒公安顧謂琮曰君前陳此孤雖
不相荅今日之捷亦君之功也於是封華亭侯

晉書曰高貴鄉公將攻文帝召王沉及王業告之沉馳
白帝以功封安平侯邑二千戶沉既不忠於主甚為衆

論所非

又曰衛瓘都督幽州以其離間二虜功賜子亭侯瓘乞以封弟未受命而亡子容受封亭侯瓘六男無爵悉讓於弟遠近稱之

隋書曰李崇字永隆英果有籌筭膽力過人周元年以父賢勲封迴樂縣侯時年尚少拜爵之日親族相賀崇獨泣賢怪而問之對曰無勲於國而幼少封侯當報主恩不得終於養是以悲耳賢由是大噐之

伯封

周書曰率衆時作謂之伯

周禮春官大宗伯職曰伯執躬圭

孝經援神契曰伯白也

魏志曰咸熙元年春晉王奏建五等伯地方六十里邑千二百戶妾四人車前司馬八人旅賁二十八人

後周書曰王勇論討茹茹功別封永固縣伯邑五百戶時有別封者例聽迴授次子勇獨請封兄子元興時人

義之

子封

周禮春官典命職曰子男五命其國家宮室車旗衣服禮儀皆以五為節

又曰春官大宗伯職曰子執鬴璧

魏志曰蔣愷濟之孫也咸熙中開建五等以濟著勲前朝改封愷為下蔡子

又曰咸熙元年相國晉王奏五等諸子地方五十里邑

八百戶相一人典祠令典書丞典衛丞各一人妾三人
車前司馬四人旅賁二十人

齊書曰王敬則封重安縣子邑三百五十戶敬則少時
於草中射獵有蟲如鳥頭集其身摘去乃脫處皆流血
敬則惡之詣道士卜道士曰不須憂此封侯之瑞也敬
則聞之喜故出都自效至是如言

環濟要畧曰子獨孳孳栖下之稱也

男封

周禮地官大司徒職曰諸男之地封疆方百里其食者
四之一

又春官典命職曰男執蒲璧

環濟要畧曰男任治事受王命為君也

魏志曰咸熙元年相國晉王奏建五等男地方三十五
里邑四百戶相一人典祠長典書丞各一名妾二人車
前司馬二人旅賁十二人又次國男方二十五里邑二
百戶

同姓封

毛詩閔宮曰乃命魯公俾侯于東奄有龜蒙遂荒大東
傳曰昔周公弔二叔之不咸故封建親戚以蕃屏周管

蔡邕霍魯衛毛聃邠雍曹滕畢原鄧郇文之昭也

文昭十六

國也邠晉應韓武之穆也

武穆四國

凡蔣邢茅胙祭周公之胤

也

周公胤六國也

又曰武王邑姜娠太叔夢天謂已余命而子曰虞將與
之唐及生文在手曰虞遂以命之

史記曰吳太伯太伯弟仲雍皆周太王之子而季歷之兄二人知太王欲立季歷乃適荊蠻以避季歷義而歸之者千餘家立為吳太伯太伯無子吳仲雍氏立五世武王克商求太伯仲雍之後得周章周章已君吳因而封之

又曰武王封吳周章之弟虞仲於虞列為諸侯十二世而為晉所滅

又曰周公旦武王之弟佐武王平紂而封於少皞之墟

曲阜是為魯公凡四十四世而楚考烈王滅魯

又曰管叔鮮蔡叔度武王之弟武王已克殷封鮮於管
封度於蔡周公誅武庚殺管叔放蔡叔蔡既遷而死其
子曰胡胡乃改行率德周公言於成王復封於蔡凡二
十五世至侯齊而楚惠王滅蔡

又曰曹叔振鐸者武王弟也武王已克殷封振鐸於曹
凡二十四世至伯陽而宋滅曹

又曰衛康叔者武王弟也周公以成王之命伐武庚放

蔡叔殺管叔以殷餘民封康叔為衛君凡三十九世至君角而秦并天下廢為庶人

又曰晉叔虞者成王之弟成王與叔虞戲削桐葉為珪以唐封汝史佚因言請擇日立叔虞成王曰吾與之戲耳史佚曰天子無戲言遂封叔虞於唐唐在河汾之東三十五世至靖公而韓魏趙三分其地

又曰鄭桓公友者周厲王庶子封於鄭二十四世至鄭君乙而韓哀侯滅鄭併其地

又曰越王句踐其先苗猶夏后少康之子封會稽以奉
守禹之祀斷髮文身二十餘世至允常子句踐立滅吳
稱霸後十世閩君搖佐諸侯平秦高祖以搖為楚王

漢書曰漢興之初尊王子弟大啓九國京師內外凡十
五郡公主列侯頗食邑其中而國大者跨州兼郡小者
連城數十也

又曰高祖封兄喜為代王匈奴入代廢為合陽侯子濞
為吳王

又曰呂后封楚王郢為下邳侯齊王肥子章朱虛侯興居東牟侯

又曰孝文封齊王肥子十人為侯淮南王子四人為侯後改封王

又曰孝景封楚王子四人為侯梁王子二人為侯

又曰淮南厲王死後孝文憐淮南王有子四人年皆七八歲迺封子安為阜陵侯子勃為安陽侯子賜為陽周侯子良為東城侯

又曰梁孝王死竇太后泣極哀不食帝哀懼不知所為
與長公主計之迺分梁為五國盡立孝王男五人為王
女五人皆令食湯沐邑奏之太后太后乃悅為帝一食
又曰孝武帝令諸王推恩分子弟諸王子孫一百七十
七人為侯

又曰武帝以子宏為齊王子旦燕王子胥廣陵王子休
昌邑王傳子賀為昭帝後即位二十七日廢歸故縣

又曰武帝使御史大夫張湯策立子闕為齊王曰於戲

小子閔受茲青社朕承祖考維稽古建爾國家封於東
土世為漢蕃輔立子旦為燕王曰小子旦受茲玄社建
爾國家封於北土子胥為廣陵王曰小子胥受茲赤社
建爾國家封於南土

又曰宣帝詔曰蓋聞象有罪舜封之其封昌邑王賀為
海昏侯

又曰宣帝封子厥為淮陽王宇為東平王囂為楚王竟
為中山王廣陵王子胥宏為高密王

又曰昭帝封諸王子孫十二人宣帝六十三人元帝封四十八人成帝封四十三人哀帝封九人平帝封四十八人為侯

續漢書曰靈帝封河間王子度為濟南王奉帝父孝仁祀

魏志曰明帝太和六年春二月詔曰古之帝王封建諸侯所以藩屏王室也詩不云乎懷德惟寧宗子維城秦漢繼周或強或弱俱失厥中大魏創業諸王開國隨時

之宜未有定制非所以永為後法也其改封諸侯王皆以郡為國

晉起居注曰武帝詔皇子裕生七歲矣得疾始封安平王

又曰武帝詔安平獻王孫承昔以父早亡不建大祚以縣封之今以三縣封為武邑王

又曰惠帝詔侍中司馬越討揚駿之功封東海王食六縣

晉百官名曰武帝以齊王璉為遼東王紹弟定國後贊
為廣陵王紹弟廣德後

陳留風俗傳曰周成王戲其弟桐葉之封周公曰君無
二言遂封之於唐後帝慎其德其詩曰媚茲一人應侯
慎德是也

華陽國志曰武帝封子穎為成都王以蜀廣漢犍為汶
山十萬戶為王國邑蜀郡太守號為成都內史

外戚封

史記曰武帝衛后弟青封長平侯四十皆封侯貴震天下
天下歌曰男生無喜女生無怒獨不見衛子夫霸天下
下

漢書曰文帝封太后弟薄昭為軹侯又封王舅駟鈞為
侯

又曰景帝封太后弟姪竇廣國為章武侯竇彭祖為皮
侯竇嬰以破吳楚功封魏其侯弟王信為益靖侯

又曰武帝封太后同母弟田蚡為武安侯勝周陽侯皇

后弟衛青以伐匈奴封長平侯皇后姊子霍去病以伐
匈奴封冠軍侯

漢書曰元帝封王皇后父禁為陽平侯薨長子鳳嗣
又曰王音既以從舅越親用事小心親職歲餘上下詔
封音為安陽侯食邑與五侯等俱三千戶

又曰成帝封太后兄子莽為新都侯宣帝博皇考皇舅
孫史丹為武陽侯皇后兄趙欽為新成侯父趙臨為成
陽侯太后姊子淳于長定陵侯中山王舅馮恭為宜陽

侯

又曰哀帝欲封祖母傅太后從弟商鄭崇諫曰孝武皇帝封親舅五侯天為赤黃晝昏日中有黑氣今祖母從昆弟二人已侯許皇后父高武侯以三公封尚有因緣今欲復封商壞亂制度逆天人心非傅氏之福

東觀漢記曰封馬防兄弟三人各六千戶為潁陽侯特以勤勞綏定西羌以襄城美亭一千二百戶增防防身帶三綬寵貴至盛

又曰鄧訓自中興後累世寵貴凡侯者二十九人貴盛莫比

後漢書曰明德馬后詔不得封外戚章帝省詔悲歎復重請曰漢興舅氏之封侯猶皇子之為王也太后誠存謙虛奈何令臣獨不加恩三舅乎且衛尉年尊兩校尉

大有病

衛尉太后兄廖兩校尉防兄光也

如今不諱使臣長抱刻骨之

恨宜及吉時不可稽留太后報曰吾反覆念之思令兩

善豈徒欲獲謙讓之名而使帝受不外施之嫌哉

以恩澤封

爵外家為外施也

昔竇太后欲封王皇后之兄

竇太后文帝后也王皇后景帝

后也兄即王信後封為益靖侯

丞相條侯言受高祖約無軍功非劉氏

不侯

條侯周亞夫也前漢書高帝與功臣約非劉氏不王非功不侯如違約天下共擊之也

今馬

氏無功於國豈得與陰郭中興之后等耶

後漢書曰陰識封陰鄉侯二年以征伐軍功增封識讓

曰天下初定將帥有功者衆臣託屬掖庭仍加爵邑不可以示天下帝甚美之

魏志曰黃初二年詔曰后族之家不得橫受茅土之爵

以此詔傳後世若有違背天下共誅之

又曰明帝追封甄后父逸安成鄉侯豫襲封後改為魏昌侯子暢嗣父封暢弟溫韡皆列侯又以後亡從孫黃合葬帝愛女淑追封黃列侯

吳志曰孫皓元年十二月封后父牧為高密侯舅何等三人皆列侯

王隱晉書曰武帝封楊后父鎮軍楊駿為臨晉侯后母太原龐為安昌鄉君太學生王銓曰侯稱臨晉後必制

國也駿漸驕傲胡奮語駿卿恃女更豪耶人與天家婚
未有不滅門者早晚事耳駿曰卿女復不在天家耶奮
曰我女與卿女作婢何能增損

又曰楊駿以女超居重位自鎮軍將軍遷車騎將軍封
臨晉侯識者議之曰夫建諸侯所以藩屏王室也后妃
所以供養盛弘內教也后父始封而以臨晉為侯兆於
亂也

太平御覽卷一百九十九

欽定四庫全書

太平御覽卷二百

宋 李昉等 撰

封建部三

以公相封

功臣封

以公相封

漢書在恩澤表紀氏
羣臣封并見此篇也

漢書曰高祖撥亂誅暴庶事草創行賞授位以能為次
叙至於孝武元功宿將畧盡上亦興文學進技幽隱公

孫弘自海濱而登宰相自是之後宰相畢侯

又曰漢帝以列侯為丞相唯公孫弘無爵為丞相上於是下詔封丞相平津侯其後以為故事丞相封侯自弘始也

又曰武帝時田千秋為高廟郎上書訟衛太子寃上亦頗知太子惶恐感悟名千秋曰父子之間人所難言此高廟神靈使公教我當遂為吾輔拜千秋大鴻臚數月為丞相封富民侯

又曰朱博以丞相封二千五百户上書故事不過千户
還千五百户

魏志曰王朗字景興文帝即位授司空進封平鄉侯子
肅嗣初文帝分朗邑封一子列侯朗乞封兄子詳

又曰崔林為司空封陽安亭侯邑六百户三公封列侯

自林始也

臣松之有言漢封丞相已為苟
悅所譏魏封三公其不同矣

又曰曹爽以大將軍輔政封武安侯邑萬二千户

又曰陳羣以鎮軍錄尚書受遺詔進封穎陰侯

又曰何夔字叔龍為太子少傅太傅文帝踐阼封陽亭侯三百戶病乞遜位詔曰以親則君有輔弼之勲以賢則君有淳固之茂

又曰劉放字子葉為中書監掌機密進封魏壽亭侯孫資為中書令封洛陽侯太和末資決策伐公孫淵進左鄉侯遼東平定以叅謀之功各封大縣放方城侯資中郡侯齊王即位以決定大謀並增邑子一人亭侯

又曰衛凱為漢侍中勸讚禪代之義為文誥之命文帝

踐祚封陽平亭侯明帝即位進闕鄉侯

又曰桓楷為尚書令封亭鄉侯及病文帝自臨省謂之曰吾方託六尺之孤寄天下之命卿勉之徙封安樂鄉侯

又曰胡質薨家無餘財唯賜衣書篋而已追封陽陵亭侯

又曰盧毓衛臻徐宣喬和洽常林杜襲裴潛韓暨高文惠王觀辛毗劉靖王基並以列卿尚書封侯

又曰漢制凡人君特所寵念皆賜之封邑及丞相初拜亦錫茅土號曰恩澤出自於情非至公之封也中興以來無有封者

功臣封

周禮夏官曰司勲掌六卿封地之法以等其功王功曰勲國功曰功事功曰勞治功曰力戰功曰多

克敵出奇
若韓信陳

平者凡有功者銘書於王之太常

史記曰古之人功有五品以德立宗廟定社稷曰勲以

言曰勞用力曰功明其等曰伐積曰曰閱

又曰太公望文王立以為師文王作鄴邑天下三分有其二及武王克紂太公之謀居多於是武王封尚父於齊營邱成王時管蔡作亂淮夷叛周乃使召康公命太公東至海西至河南至穆陵北至無棣五侯九伯汝實征之齊由此得專征伐為大國二十八世

又曰召公奭與周同姓武王滅殷封召公於燕其在成王時自陝以西召公主之自陝以東周公主之四十三

世秦始皇滅之

又曰楚出自帝顓頊高陽後吳回居火正為祝融吳回
生陸終陸終子六人少曰季連季連之苗胤曰鬻子鬻
子事周文王早卒當成王之時舉文武勤勞之嗣乃封
其後熊繹於楚以子男之國三十世至負芻而秦滅楚
又曰魏者畢公高之後畢公高與周同姓武王封之於
畢其後曰畢萬事晉獻公伐霍取魏滅之因以魏封畢
萬為大夫卜偃曰畢萬之後必大萬盈數也魏大名也

以是始賞天啟之矣其後魏獻子舒為晉卿至魏文侯
為諸侯子武立與韓趙共滅晉國三分其地又七世至
王假秦滅魏

又曰韓與周同姓其後世事晉得封於韓原曰韓武子
武子三世有韓厥從封姓為韓氏六世至景侯虔始列
為諸侯及孫哀侯與趙魏共滅晉三分其地八世至王
安而秦滅韓

又曰趙氏之先與秦共祖造父事周穆王攻徐破之乃

賜以趙城七世叔帶去周入晉趙氏五世而至趙夙夙生衰衰生盾並為大夫其後趙鞅是為簡子始大又四世而至列侯籍始立為諸侯三世至敬侯與韓魏共滅晉分其地又七世至幽王繆降秦而趙滅

又曰陳完者陳厲公佗之子完後奔齊為田氏齊懿氏欲妻之卜之曰是謂鳳凰于飛和鳴銜銜有媯之後將育于姜八世之後莫之與京卒妻之完卒謚為敬仲六世而至田常田常殺齊敬公立簡公弟平乃割齊安平

以東為已封封邑大於齊至曾孫和遂遷齊康公於海上而田和立為齊侯五世至王建為秦所滅

又曰西戎與申侯伐周殺幽王驪山下秦襄公將兵救周避犬戎難東徙雒邑襄公以兵送周平王平王封襄公為諸侯賜之岐以西之地於是始國與諸侯通

又曰樂毅并護趙楚韓魏燕之兵以伐齊破之追至於臨淄齊湣王走保於莒樂毅獨留徇齊攻入臨淄盡取齊寶財物祭器輸之燕燕昭王大悅親至濟上勞軍行

賞饗士封殺於昌國號昌國君

漢書曰項羽佯尊懷王為義帝實不用其命二月羽自立為西楚霸王王梁楚地九郡都彭城背約更立沛公為漢王巴蜀漢中四十一縣都南鄭三分關中立秦三

將章邯為雍王都廢丘

縣名今槐里是

司馬欣為塞王

韋昭曰在長安

東名桃林塞也

都櫟陽董翳為翟王

文穎曰本上郡秦所置項羽更名為翟也

都高

奴楚將瑕丘申陽為河南王都雒陽趙將司馬卬為殷王都朝歌當陽君英布為九江王都六懷上柱國共敖

為臨江王

本南郡改為臨江國

都江陵藩君吳芮為衡山王都邾

文潁曰邾音朱縣名

故齊王建孫田安為濟北王徙魏王豹為西

魏王都平陽徙燕王韓廣為遼王燕王臧荼為燕王都
薊徙齊王田市為膠東王齊將田都為齊王趙歇為代
王趙相張耳為常山王也

又曰漢四年立韓信為齊王徙為楚王五年以九江王
英布為淮南王盧綰為燕王韓信為代王彭越為梁王
又曰尅項八載天下乃平始論功侯者四十有三人時

人民流散王公侯不過萬家封爵之誓曰使黃河如帶
太山如礪於是申以丹書之信重以白馬之盟藏諸宗
廟副在有司迨文景四五世間流民既歸戶口亦息列
侯大者三四萬戶小國自倍其後子孫驕恣忘其先祖
之艱難多陷法禁訖於孝武後元之年靡有子遺

又曰漢封功臣張良未嘗有戰鬪功高帝曰運籌策帷
幄中決勝千里外子房功也乃封良為留侯與蕭何俱
封六年上已封大功臣二十餘人其餘日夜爭功未決

未得行封上在雒陽南宮從複道

如淳曰上下有道故謂之複也章昭曰間

道也

望見諸將往往相與坐沙中語上曰此何為留侯曰

此謀反耳上曰為將奈何留侯曰上平生所憎羣臣所共知誰最甚者上曰雍齒數嘗窘辱我留侯曰今急先封雍齒以示羣臣於是上置酒封雍齒為什方侯皆曰雍齒且侯我屬無患矣

又曰高祖以蕭何功最盛封為酈侯所食邑多功臣皆曰蕭何未嘗有汗馬之勞反居臣等上何也帝曰諸君

知獵乎追殺獸者狗也至於發縱指示獸處者人也今諸君徒能得獸耳功狗也至如蕭何發縱功人也且諸君獨以隨我多者兩三人何舉宗數十人皆隨我功不可忘也皆曰平陽侯曹參身被七十創攻城畧地功最多宜第一鄂君進曰羣臣議皆誤陛下雖亡山東何常全關中以待陛下此萬世之功奈何以一旦之功而加萬世之功哉蕭何第一曹參次之上曰吾聞進賢受上賞蕭何功雖高得鄂君乃益明封鄂君故所食關內侯

邑封為安平侯

又曰高祖封項伯等四人為列侯賜姓劉氏

又曰項羽被十餘創顧見漢騎司馬呂馬童曰若非吾故人乎馬童面之指王翳曰此項王也羽迺曰吾聞漢搆我頭千金邑萬戶吾為公得之乃自剄王翳取其頭亂相蹂躪爭羽相殺者數十人最後揚喜呂馬童呂勝揚武各得一體故分其地以封五人為列侯

又曰陳豨反上至自邯鄲喜曰豨不南據於漳水吾知

其無能為矣上令周昌選趙壯士可令將者見因四人
上嫚罵曰豎子能為將乎四人慙皆伏地上封各千戶
以為將

又曰淮陰侯韓信舍人樂說告信反封順陽侯

又曰文帝詔曰方大臣諸呂迫朕狐疑皆止朕唯中尉
宋昌勸朕朕已得保宗廟已尊昌為衛將軍其封昌為
壯武侯

又曰韓王信入匈奴與太子俱至顏當城生子因名顏

當至孝文時降封弓高侯顏當孽孫媽貴幸顯當世媽弟說以校尉攻匈奴封龍顏侯

又曰景帝時封功臣衛綰直不疑等十九人綰封建陵侯不疑塞侯

又曰張賀為掖庭令而宣帝以皇曾孫時收養掖庭恩甚密焉及宣帝即位而賀已死宣帝追思乃封其家為恩德侯置守冢二百人

東觀漢記曰光武功臣鄧禹等二十八人皆為侯封功

臣一百八十九人

又曰李通上司空印綬以特進奉朝請久之有司奏請
付諸皇子上感通建創大謀曰封通少子雄為邵陸侯
又詔封竇融曰行河西五郡大將軍涼州牧張掖屬國
都尉竇融執志忠孝扶微救危仇疾反虜隗囂率厲五
郡精兵羌胡畢集兵不血刃而虜土崩瓦解功既大矣
篤意分明斷之不疑吾甚嘉之其以六安豐陽原蓼安
凡四縣封融為安豐侯

又曰三輔豪傑入長安攻未央宮杜虞殺莽於漸臺東海公賓就得其首傳詣宛封滑侯

又曰申屠公志以功封汝陰王上書以非劉氏還玉璽改為潁陽侯

又曰班超定西域五十餘國乃詔封為定遠侯

後漢書曰單超左綰徐璜具瑗唐衡桓帝時共誅梁冀同日封侯謂之五侯於是朝廷日亂超薨之後其四侯轉橫天下為之語曰左迴天具獨坐徐卧虎唐兩墮

魏志曰夏侯淵字妙才以功封博昌亭侯太祖下令曰
淵虎步關右所向無前仲尼有言吾與爾俱不如也後
戰死黃初太和中賜淵子五人皆爵關內侯

又曰吾起義兵誅暴亂於今十九年所征必克豈吾功
哉乃賢士大夫之力也天下雖未悉定吾要與賢士大
夫共定之而專饗其勞苦何以安焉其保定功行封於
是大封功臣二十餘人皆為列侯其餘各以次受封及
復死事之孤輕重各有差

又曰曹洪字子廉以功封野王侯文帝時坐事削明帝即位更封樂成侯

又曰曹休字文烈自荊州北歸太祖曰此吾家千里駒也文帝錄前後功封為東亭侯

又曰曹真字子丹以功封邵陵侯真少舉宗人尊鄉人朱讚並事太祖尊早亡真愍之乞分食邑封尊子等詔曰大司馬有叔向撫孤之仁晏平仲久要之義聽分賜尊子等爵關內侯及真薨明帝悉封真五子皆列侯

又曰太祖自柳城還稱荀攸前後謀謨曰昔高祖使張子房自擇齊三萬戶今孤亦欲使君自擇所封

又曰太祖見賈詡執手曰使我信重於天下者子也表為執金吾封都亭侯文帝即位又封詡小子訪為列侯

又曰郭嘉字奉孝冀州平封齊陽亭侯及薨太祖表曰臣策未決嘉輔成之平定天下其功為最增邑并前千

戶

又曰張既字德容詔曰卿勲非但破胡乃永寧河右使

吾長無西顧之念徒封西鄉侯

又曰任峻字伯遠為典農中郎大興屯田軍國致饒太祖以峻功高表封都亭侯

又曰張遼字文遠以功封都亭侯又討陳蘭梅成等入瀟山中蘭等壁其上遼力戰平之太祖論諸將功曰登天山以取蘭成盪寇功也乃增邑文帝又分封兄況及一子列侯明帝踐阼進封晉陽侯及薨詔曰合肥之後遼以步卒八百破賊十萬自古未之有也其分遼邑賜

一子爵關內侯

又曰太祖表封荀攸曰前剋敵皆攸之謀也於是封攸
陵陽亭侯

又曰太祖謂于禁曰溝水之難吾焉能也將軍在亂能
正雖古之名將何以加之乃錄前後功封壽亭侯

又曰文帝踐阼進張郃為鄭侯明帝詔曰賊亮以巴蜀
之衆將軍所向克定乃益戶并前四千三百戶郃前後
有功明帝分郃戶封四子列侯

又曰朱靈字文博先封郿侯文帝詔曰將軍佐命先帝
威過方名平生所志願勿難言靈謝曰高唐所鎮乃更
封高陽侯

又曰龐德以衆降太祖聞其驍勇封關內亭侯為關公
所得罵公而死太祖悲之封其二子為列侯

又曰徐邈字景山西域流通荒戎入貢皆邈勲也以功
封都亭侯

又曰王昶字文舒討諸葛誕誅詔曰昔孫臏佐趙輸

大梁兵驟進此所以成兵勢也增邑四千七百戶

吳志曰駱統字公緒初曹仁攻濡須使別將常雕等襲中洲統與嚴圭共拒破之封新陽亭侯

晉書曰苻堅南寇桓伊與冠軍將軍謝元輔國將軍謝琰俱破堅於肥水以功封永循縣侯進右軍將軍賜錢百萬袍表千端

王隱晉書曰封宣帝為武平侯公孫淵平又增封舞陽昆陽二縣

又曰封文帝為高都侯大始元年詔曰昔唐虞三代之
盛暨於漢魏創制度褒崇元勳班爵行賞與國同體施
祿逮下萬邦咸乂朕以寡德登於天位託於王公之上
腹心股肱文臣武臣光齊帝業余嘉乃勲慶賞之行其
用宜速

又曰張華傳曰華以建策功加右光祿大夫開府儀同
三司固辭不受詔聽之及更論平吳之功封華郡公三
千戶主者擇近郡平土詳依典制施行華讓前後十餘

頻繁懇誠詔不聽遂受封

晉中興書曰元帝以佐命功封周玘烏程公又封王敦

武昌公

又曰孔愉字敬康以討華軼功封愉餘下亭侯初愉少時嘗得一龜放於餘溪中流左顧者數過及鑄侯印見龜左顧更鑄猶然印工以聞愉悟遂佩焉

又曰明帝以平錢鳳功封溫嶠始興公蘇峻邵陵侯劉泉泉陵侯應詹觀寧侯卞郭益陽侯趙允湘南侯

又曰成帝以平蘇峻功封公者三人侯者八人又以討郭默功封者三人穆帝以平蜀功封桓温臨賀公

又曰哀帝以平闕洛功封桓冲豐城公海西公以平袁真功賜桓温子偉為西昌公

又曰安帝以興復功封劉裕等二十三人裕昌謀封豫章公萬戶劉毅南平公五千戶何無忌安成公劉道規
華容公

晉起居注曰太康元年詔曰張華前與故太傅創謀大

計部分方策有謀謨之勲封廣武侯邑萬戶

又曰惠帝追封衛瓘為郡公

會稽典錄曰鄭吉既破車師降日逐威鎮西域遂并護單于北道故號都護之置自吉始焉上嘉其效乃下詔曰都護西域騎都尉鄭吉撫循外蠻宣明威信功效茂著其封吉為安遠侯

華陽國志曰漢高帝滅秦為漢王巴蜀閬中人范自有恩信方畧為帝保民與西秦地既定封自為長安建章

郡侯帝將征關東竇氏皆思歸嘉其功難傷其意遂聽
還謂曰富貴不歸故鄉如衣繡夜行可徒封自閬中慈
鄉侯自固辭乃封度汧縣侯

太平御覽卷二百